

蜀鑑

第叁冊



蜀鑑卷第四

晉王濬自蜀平吳

晉武帝泰始十年吳大司馬陸抗卒

抗疾病上疏曰西陵建平國之蕃表既  
處上流受敵二境若敵汎舟順流星奔  
電邁非可恃援他部以救倒懸也此乃  
社稷安危之機非徒封疆侵凌小害也  
臣父遜昔在西垂上言西陵國之西門



雖云易守亦復易失若有不守非但失一郡荊州非吳有也如其有虞當傾國爭之乞特詔簡閱使臣所部足滿八萬省息衆務併力備禦臣死之後乞以西方為屬○西陵今峽州建平今歸州咸寧二年征南將軍羊祜上疏請伐吳祐鎮襄陽與陸抗對境嘗與抗連和會抗卒祜上疏曰蜀平之時皆謂吳當并

亡十有三年矣蜀之為國非不險也皆云一夫荷戟千人莫當及進兵之日曾無藩籬之限乘勝席卷徑至成都漢中諸城皆鳥栖而不敢出非無戰心誠力不足相抗也及劉禪請降諸營堡索然俱散今江淮之險不如劔閣孫皓之暴過於劉禪吳人之困甚於巴蜀而大晉兵力盛於往時今若引梁益之兵水陸

俱下荆楚之衆進臨江陵平南豫州直指夏口徐揚青兗並會秣陵以一隅之吳當天下之衆勢分形散所備皆急巴漢竒兵出其空虛一處傾壞則上下震蕩雖有知者不能為吳謀矣咸寧四年祐病求入朝面陳伐吳之計且曰平吳之後當勞聖慮耳還鎮舉杜預為鎮南將軍都督荊州諸軍事

咸寧五年益州刺史王濬上疏請伐吳  
羊祐以王濬為益州太守濬大治舟艦木梯蔽江而下乃上疏曰孫皓荒淫凶益宜速征伐臣作船七年日有朽敗願無失事機

吳  
太康元年王濬唐彬會杜預王渾諸軍伐

大舉伐吳王渾出江西杜預出江陵王

潛唐彬下巴蜀王潛唐彬擊破丹陽吳人於江磧要害之處並以鐵鎖橫截之又作鐵錐長丈餘暗置江中以逆拒舟艦潛作大筏數十方百餘步縛草為人披甲持杖令善水者以筏先行遇鐵錐錐輒著筏而去又作大炬長十餘丈大數十圍灌以麻油在船前遇鎖然炬燒之須臾融液斷絕於是船無所礙○丹

陽城屬秭歸

王潛克西陵克荆門夷道二城

杜預進攻江陵克之預等分兵以益潛攻武昌克之

王潛自武昌徑趣建業入于石頭吳主皓請降

王潛既至西陵杜預與之書曰足下既摧其西藩便當徑取建業討累世之逋

寇釋吳人於塗炭亦曠世一事也濬自  
武昌徑趣建業兵甲滿江旌旗燭天威  
勢甚盛吳潘濬入見吳主吳主問水軍  
消息對曰蜀船皆小今得二萬兵乘火  
船以戰自足破之於是合衆授潘濬節  
鉞明日當戮其衆悉潰王渾遣信要王  
濬暫過論事濬舉帆直指建業報曰風  
利不得泊也是曰濬戎卒八萬方舟百

里鼓譟入于石頭吳主皓面縛輿襯詣  
軍門降○建業建康府石頭城在建康  
論曰秦自蜀伐楚未大得志也王濬以  
益州之力破丹陽克西陵下荊州攻武  
昌片帆而直指建業遂平江東其功偉  
矣蜀係於上流之安危亦大彰明較著  
矣晉武之平吳用蜀之力如此而子孫  
之偏安於江東者乃棄蜀弗顧可勝責

蜀鑑卷四  
五  
哉

李特入蜀

晉惠帝元康八年巴氏流人李特等自略陽入蜀

初張魯在漢中賓人李氏自巴西宕渠往依之魏武克漢中李氏歸之遷於略陽號曰巴氏其孫特庠流皆有材武關中荐飢略陽天水等六郡民流移就穀

入漢川者數萬家道路窮乏特兄弟振救之由是得衆心流民至漢中上書求寄食巴蜀詔書不聽勅關禁之戶曹李苾開關放入散在梁益不可禁止李特至劔閣太息曰劉禪有如此地面縛於人豈非庸才邪

永康九年李特入成都殺前益州刺史趙廞

趙廞陰有據蜀之志以李特兄弟材武厚遇之詔徵廞為大長秋以耿滕為益州刺史廞遂殺滕自稱益州牧任用李庠庠驍勇得衆廞心忌之會庠勸廞稱帝廞斬之李特李流怨廞引兵軍綿竹廞遣費遠斷北道屯綿竹之石亭李特收兵得七千餘人襲遠等軍破之遂進攻成都廞走廣都為從者所殺

### 羅尚討李特

永寧元年詔羅尚為益州刺史

特等聞尚來甚懼以牛酒勞尚於綿竹牙門將王敦廣漢太守辛冉勸尚誅特尚不從

符下秦雍召還流民入蜀者以李特為宣威將軍

朝廷符下秦雍使召還流民又遣御史



督之李特兄輔自略陽至蜀言中國方  
亂不足復還特然之累遣天水閻式詣  
羅尚求權停至秋朝廷論討趙廞功拜  
特宣威將軍弟流奮威將軍皆封侯璽  
書下益州條列流民與討廞者將加封  
賞辛冉寢朝命不以實上衆咸怨之羅  
尚督流民限七月上道時流民布在梁  
益為人傭力聞州郡逼遣人人愁怨不

知所為特復遣閻式詣尚求停至冬  
辛冉李苾以為不可尚舉別駕杜弼秀才  
式為弼說逼移利害弼亦欲寬流民一  
年尚不從冉苾與尚謀欲殺流民取其  
資貨尚移書令梓潼太守張演於諸要  
施關搜索寶貨特數為流民請留流民  
皆相率歸特特又以計激怒之旬月之  
間歸特者二萬人流亦聚衆數千人特

又遣閻式詣尚告諸流民今聽寬矣式  
至綿竹勸特深宜為備特從之

廣漢太守辛冉犍為太守李苾襲李特營  
不克特攻冉於廣漢冉敗奔德陽特據廣  
漢遂攻羅尚於成都

尚頻為特所敗乃阻長營緣郫水作營  
連延七百里與特相拒

太安元年以張微為廣漢太守軍德陽特  
攻微取德陽以其將蹇碩守之李驤李流  
進攻成都

太安二年詔荊州刺史宗岱建平太守孫  
阜帥水軍三萬以救羅尚阜進逼德陽特  
遣任臧拒之

羅尚遣兵討特斬之傳首洛陽

孫阜破德陽獲蹇碩任臧退屯涪陵

李流至成都羅尚閉城自守

李雄襲擊孫阜軍大破之宗岱卒於墊江  
荊州軍遂退

雄特子德陽今遂寧府墊江今合州涪  
陵今涪州荊州之軍自墊江上也

李雄入成都

太安二年李雄攻殺汶山太守陳圖遂取  
郫城李流徙屯郫

汶山今茂州郫城今郫縣

李流卒李雄自稱益州牧治郫城

羅尚襲郫城不克退保太城

李驤攻犍為斷羅尚運道獲太守襲恢殺  
之

犍為時治武陽今犍為縣輿地廣記云  
即武陽縣地犍為郡由郡嘗治此而得  
名也近世為江鄉志者乃謂治今彭山  
非是

李雄攻羅尚尚由牛鞞水東下雄入成都  
牛鞞今簡州安縣縣即中水也入江陽  
都江

羅尚抗李雄

永興元年羅尚主江陽

尚遣使表狀詔尚權統巴東巴郡涪陵  
以供軍賦尚遣別駕李興詣荊州劉弘  
求糧弘綱紀以運道阻遠且荊州自空

乏欲以零陵米五千斛與尚弘曰天下  
一家彼此無異吾今給之則無西顧之  
憂矣又遣治中何松屯巴東為尚後繼  
巴東今歸州

羅尚移屯巴郡遣兵擊蜀獲李驤妻督氏  
及子壽

巴郡治江州今夔州重慶府

永嘉元年尚施置關戍至漢安棘道

漢安今資州夔道今敘州成漢安所以  
防中水成夔道所以防大江尚在江州  
而設戍於此則捷為南安以西皆為雄  
有也

秦州流民鄧定等據成固掠漢中李雄遣  
李離等助之遂陷南鄭離等引還盡徙漢  
中民於蜀漢中入句方伯洛帥吏民還守  
南鄭

永嘉二年雄遣將運李鳳也晉壽以寇漢  
中詔以張光為梁州刺史治新城

晉壽漢葭明縣昭烈改為漢壽晉秦始  
中改為晉壽新城魏文帝分漢中立新  
城郡治房陵

天水司鐸琦殺雄太尉以梓潼降尚驥及  
琦等戰敗死

永嘉四年荊州牧劉弘表譙登為梓潼內

史登進攻宕渠殺雄巴西太守還據涪城  
登譙周孫居巴西雄巴西太守馬脫殺  
登父登詣劉弘請兵復譙弘表登為梓  
潼內史使豸三巴蜀漢民為兵克復州  
郡登進攻宕渠殺馬脫食其肝會梓潼  
降登進據涪城雄自攻之為登所敗

涪城今綿州

雄以李國鎮巴西天水文石殺國以巴西

降尚

巴西治閬中晉志充國宕渠安漢皆屬  
巴西郡

折衝將軍張羅進據犍為之合水

華陽國志云巴蜀為語曰譙登治涪城  
文石在巴西張羅守合水巴氏那得前  
合水在今嘉定府龍遊縣青衣水出  
於廬山之徼外合於岷江故謂之合水

雄遣張寶襲梓潼句琦等奔巴西  
秋七月散騎常侍都督梁益二州夷陵侯  
羅尚薨

論曰李特父子乘晉室之亂跳梁於蜀  
土一羅尚庸人耳徒以晉室方伯之權  
猶能誅特而抗雄雄雖僭踞於蜀漢中  
三巴之地固非其有也當是時中原政  
亂劉弘雖死而琅琊在建業陶侃在武  
昌蜀之衣冠南下荊州者十餘萬譙登  
等猶能崛起以自立使江左君臣有跨  
有荆益之規模任陶侃以討賊之責驅  
蜀土之人士西歸以興復則雄豈遂為  
逋誅不討之寇哉惜乎茂弘士行為謀  
之不遠而遂委蜀於蠻夷也

### 李雄偽定蜀地

永嘉四年以皮素為益州刺史羅宇殺素

于巴郡建平都尉暴重殺宇官屬表韓松  
為刺史治巴東

李雄遣李驤攻譙登于涪城羅尚之子  
宇惡登不給其糧皮素至巴郡欲治宇  
罪羅宇使人夜殺之暴重還殺宇巴郡  
亂官屬表監軍韓松為刺史

永嘉五年李驤拔涪城梓潼太守譙登死  
之遂拔巴西太守文石死之始定巴西梓

### 潼地

驤攻登於涪城登食盡援絕驤攻之急  
士民皆薰鼠食之餓死甚衆無一人叛  
者正月拔之遂乘勝拔巴西殺文石於  
是巴西梓潼為雄有雄大赦改元玉衡  
譙登至成都不屈雄殺之

雄遣師攻棘道捷為太守魏紀棄城走江  
陽太守姚襲死之



樊道今敘州犍為治今敘州犍為縣資  
中牛鞞南安諸邑皆隸焉江陽今瀘州  
雄始定其地

氏隗文等作亂暴重討之重殺刺史韓松  
自領其事

隗文等反於宜都在峽州

巴東將吏殺暴重表巴郡太守張羅行三  
府事羅與隗文等戰死之表王異行刺史

隗文等驅略吏民以降于雄

華陽國志曰巴中無復餘種矣三府事

謂平將軍益州刺史西夷校尉

江陽太守張啓殺刺史王異而代之啓卒

官屬表涪陵太守向沈代啓南保涪陵

愍帝建興元年向沈卒蜀郡太守程融等

表汶山太守蘭維為西夷校尉維將吏民

北出至巴東雄將李恭費黑等獲之

於是自巴郡以東皆為雄有矣

涪陵至運巴西王建寇漢中梁州太守張光遣參軍晉邈擊殺之建子壻楊虎收餘衆屯于厄水光遣子孟萇討之不克

厄水在南鄭縣東

武都氏王楊難敵遣兵救楊虎擊張孟萇孟萇敗績死之光卒州人立胡子序領梁州楊虎難敵攻序序棄城走

建興二年漢中民張咸等逐楊難敵以其地降于雄遂定漢中

雄以李鳳為梁州刺史任回為寧州刺史李恭為荊州刺史

以鳳理漢中回謀南中恭控巴東也

蜀人杜弼等流徙荆湘

晉太安二年益州流民十餘萬戶徙荊州李特之亂三蜀民流迸南入東下城邑

皆空野無煙火其入荊州者十餘萬戶  
羈旅貧乏鎮南將軍劉弘大給其田及  
種糧擢其賢才隨才授用流民稍安○  
永嘉五年蜀人李驤殺樂鄉縣令南平太  
守應詹醴陵令杜弼擊破之

巴蜀流民布在荊州間數為土民所侵  
苦蜀人李驤聚眾據樂鄉應詹與杜弼  
擊破之弼字景文蜀郡成都人祖植有

名蜀土才學著稱州舉秀才為成都別  
駕巴氏流民入蜀羅尚督追之弼勸尚  
寬流民一年尚不從弼致秀才板歸家  
李特反弼避地荊州應詹愛其才而禮  
之避為醴陵令驤聚眾屯樂鄉弼擊破  
之

荊州太守王澄討驤驤請降澄許而襲殺  
之以其妻子為賞沉八千餘人於江

益州流民起兵湘州奉杜弼為主南破零  
桂東掠武昌

李驤既死流民益怨恨杜疇蹇撫等復  
擾湘州參軍馮素與流民汝班蹇碩等  
不協言於刺史荀晔曰流人皆欲反晔  
以為然欲盡誅流人班等懼死聚眾以  
應疇杜弼時在湘中眾共推為主晔委  
城走攻下郡邑

征南將軍山簡鎮夏口弼具陳其事簡尋  
卒

王澄遣王機擊弼不克澄徙治孱陵

永嘉六年以周顛為荊州刺史王敦遣陶  
侃尋陽太守甘卓共擊弼王敦殺王澄  
顛始至州建平流民傳密等叛迎杜弼  
被遣別將王真襲沔陽顛狼狽失據王  
敦誣王澄與弼通信縊殺之

建興元年周顛屯潯陽破掠其人口陶侃遣朱伺救之伺大破破師于武昌拜侃荊州刺史

陶侃兵敗於杜曾王敦表侃白衣領職侃帥周訪等進擊杜破之復侃官

建興三年杜破移書應詹請降於瑯邪王王許之

破遣應詹書曰天步艱難始自吾州州

黨流移在於荆土其所遇值蔑之如遺頌伏死亡者略復過半備嘗荼毒足下所鑒也客主難久嫌隙易結不謂樂鄉起變出於不意時與足下思散凝結求離其黨帥惟恐筭不經遠力不陷堅耳及在湘中懼死求生遂相結聚欲守善自衛天下小定然後輸誠盟府尋山公鎮夏口即具陳之此公鑒開塞之會察

窮通之變納吾於衆疑之中非高識之  
覩孰能若此西州人士得沐浴於清流  
豈惟滌蕩瑕穢乃骨肉之施此公薨逝  
斯事中廢賢愚痛毒竊心自悼欲遣滕  
永大張休豫詣大府備列起事以來本  
末但恐貪功徇名之徒將讒間於聖主  
之聽戮吾使於市朝以彰叛逆之罪故  
未敢遣之而甘陶卒至水陸十萬旌旗

曜於山澤舟艦侈於三川威則威矣然  
吾衆竊未以為懼昔文伐原以全信為  
本故能使諸侯歸之陶侃宣赦書而繼  
之以進討豈所以崇奉明詔示軌憲於  
四海逼向義之夫以為叛逆之虜歟思  
善之衆以極不赦之責非不戰而屈人  
之筭也驅略烏合欲與為死者求一戰  
未見爭衡之微權也吾之赤心貫於神

明西州人士卿粗悉之身寧當令抱枉  
於時不證於大府耶昔虞卿不營大國  
之相與魏齊同其安危司馬遷明言救  
李陵雖刑殘而無慨足下抗威千里聲  
播岷衡進宜為國思靜難之略退與舊  
交措枉直之正不亦綽然有餘裕乎望  
卿騰吾牋令時達盟府遣大使之臨使  
吾得披露肝膽沒身何恨哉伏想盟府

必結紐於紀綱為一康於聖世使吾廁  
列義徒負戈前驅迎皇輿為閭闔掃長  
蛇於荒裔雖死之日猶生之年也若欲  
掃清方夏却定中原吾得一年之糧使  
泝流西歸夷李雄之逋寇修禹貢之舊  
獻展微勞以補往愆復州邦以謝鄰國  
亦其志也惟所裁處耳吾遠州寒士與  
足下出處殊倫誠不足感神交而濟其

傾危但顯吾忠誠則汶嶽存忠順之怒  
衡湘無伐叛之虞惟足下宏納之望拯  
吾徒陷溺之艱焉可金玉其音哉然顯  
顯十餘萬口亦勞瘁於警備思放逸於  
南畝矣衡嶽江湘列吾左右若往言有  
貳血誠不亮益州受殃不惟鄙言而已  
詹甚哀之乃啓呈弢書并上言曰弢益  
州秀才素有清望文理既優幹事兼美

往因使流寓居詹郡界其真心堅白詹  
所委悉李驥為變樂鄉劫略良善弢時  
出家財招募忠勇登壇歃血義誠慷慨  
會驥攻燒南平弢遂東流巴漢與湘中  
鄉人相遇推其素望遂相憑結論弢本  
情非首作亂階者也然破湘州實弢之  
罪亦由兵交其間遂使滋蔓按弢今書  
血誠亦至矣昔朱鮪自疑於洛陽光武



指河水以明心鮪感義歸誠終展力報  
施受封侯之寵尚恕過錄功也詹竊謂  
今者當厄運之會思弘遠猶故齊赦射  
鉤之誅晉貫斬祛之戮用能濟翼戴之  
高勲隆一康之美譽况弢等素無斯愆  
而稽顙投命邪以為可遣大使宣揚聖  
旨雲澤沾之於上百姓沐浴於下則上  
下交泰江左無風塵之虞矣○通鑑不

載弢與應詹書本末今具錄如右蜀土  
流移十萬餘家離散不保此大事也豈  
宜略邪按此乃陶侃上憚王敦規模不  
大不能招納弢等欲討殺以論功耳晉  
史以成敗論人乃謂弢等請降於元帝  
帝不許觀弢與詹書則先未嘗請降而  
不許也又謂弢偽降於山簡皆非其實  
讀史者以意逆志可也

蜀鑑卷四  
以弢為巴東監軍使前南海太守王運受  
其降諸將攻弢不已弢遂殺運遣其將王  
貢入武陵五谿斷官軍運道

弢既受命諸將徇功者攻之不已弢不  
勝憤怒殺運復反○武陵今常德府路  
通五谿蠻

陶侃應詹進攻杜弢弢將王貢出降弢遁  
走不知所在

侃等諸軍齊進弢乃逃遁不知所在城  
中金寶溢目應詹一無所取惟取圖書  
莫不歎之○晉史應詹傳稱賊中金寶  
溢目應詹但取圖書豈有賊而載圖書  
者乎此皆梁益流徙之衣冠也悲夫  
論曰蜀之流民十餘萬家流徙東下劉  
和季在江陵給其田疇山季倫在夏口  
接其歸附庶乎招懷之略矣四方蹙蹙

江左獨安瑯琊君臣念流離之及境隨  
才授任援之甲兵反其鋒而用之李雄  
僭號而魚復江關曾莫之守固可長驅  
而復舊物合二長以圖中原也王處仲  
剛愎猜忍不忠王室陶士行亦不知此  
乃以討杜弢為莫大之功振旅紀勲由  
此專任上流則亦陋矣哉愚觀士行與  
溫太真共討蘇峻獨以不與顧命為歉

且恃其區區之糧峙欲貳其勤王之誠  
心事之不純抑亦可知是雖神機明鑒  
克勤小物功烈之在晉者如彼其卑也  
烏得為忠順如孔明者乎然巴氏至蜀  
者二萬人耳而蜀土衣冠不務糾鄉閭  
為討僭逆守墳墓之計乃輕脆易驚率  
然東下墮踣異鄉陷於誅死之罪杜弢  
之事其亦蜀土之永鑒歟

元溫討李勢

晉穆帝永和二年十一月荊州刺史元溫  
伐蜀拜表遂行

溫將伐蜀將佐皆以為不可袁喬勸之  
曰李勢無道臣民不附且恃其險遠不  
脩戰備宜以精卒萬人輕齎疾趨比其  
覺之我已出其險要可一戰擒也蜀地  
富饒戶口繁庶諸葛武侯用之抗衡中  
夏若得而有之國家之大利也溫從之  
十一月辛未溫帥益州刺史周撫南郡  
太守譙王無忌伐蜀拜表即行

溫軍泝魚復

諸葛亮造八陣圖於魚復平沙之上壘  
石為八行行相去二丈溫見之謂此常  
山蛇勢也○魚復今夔州奉節縣

永和三年三月溫軍至青衣漢主勢遣李

福李權向彭模督堅引兵向捷為

福等自山陽趣合水諸將欲設伏於江南以待晉兵督堅不從引兵自江北鴛鴦碕渡向捷為○青衣今嘉州山陽在廣都合水今嘉定府龍游縣鴛鴦碕華陽國志寰宇記並載在今敘州南溪縣督堅畏溫故迂路怯懦引兵自鴛鴦碕向捷為也捷為今敘州府捷為縣

溫至彭模督堅至捷為還自沙頭濟衆潰溫至彭模議欲分為兩軍異道俱進以分漢兵之勢袁喬曰今懸軍深入若分兩軍萬一偏敗大事去矣不如全軍而進齎三日糧示無還心勝可必也乃自將步卒直指成都李福進攻彭模孫盛等奮擊走之溫進遇李權三戰三捷督堅至捷為乃知與溫異道還自沙頭津

後比至溫已軍成都之十里陌堅衆自  
潰○沙頭在今崇慶府新津縣彭模今  
眉州彭山縣

溫長驅至成都李勢降

勢悉衆出戰于笮橋袁喬督士卒戰大  
破之勢輿櫬出降○舊史稱李勢夜遁  
九十里至晉壽葭萌城然後出降通鑑  
亦言走之葭萌此俱誤也成都去葭萌

何但九十里勢降表言即日到白水城  
姑少避溫鋒耳豈真走至葭萌白水者  
晉史大抵舛誤無法司馬公辨之亦時  
有不精耳

四月溫振旅還江陵

溫留成都三十日李勢降表以三月十  
七日降溫也○李特以惠帝元康八年  
入蜀特子雄雄傳姪班子期殺班李驤

子壽殺期壽傳子勢六世至永和三年  
滅凡五十年

論曰李雄之據蜀也此不得漢中而瞿  
唐灑預又無一夫之守二門悉開洞見  
堂奧元溫之汧魚復也徘徊以觀八陣  
之圖如入無人之境而遂制蜀之死命  
矣嗚呼然後知陶士行坐鎮荊州四十  
一年曾不加一矢於僭偽真不忠於晉

室也哉

李壽縱獠於蜀

晉康帝建元元年蜀李壽從牂柯引獠  
入蜀

李雄時嘗遣李壽攻朱提遂有南中之  
地壽既篡位以郊甸未實都邑空虛乃  
徙傍郡戶三丁已上以實成都又從牂  
柯引獠入蜀境自象山以北盡為獠居

蜀本無獠至是始出巴西渠川廣漢陽  
安資中樵為梓潼布在山谷十餘萬落  
時蜀人東下者十餘萬家獠遂挾山傍  
谷與下人參居參居者頗輸租賦在深  
山者不為編戶種類滋蔓保據巖壑依  
林履險若履平地性又無知殆同禽獸  
諸夷之中難以道義招懷也○北史不  
載李壽縱獠而言獠自出未知首禍知  
因賴李膺益州記詳著其始惜司馬公  
之不及此也象山未知何地  
論曰蜀之衣冠流徙荆湘而名郡樂郊  
皆為獠居矣至唐末而患猶未已也文  
物之不逮於兩京幾數百年職此之由  
自蜀通中國以來得禍未有如是之酷  
且久也可不鑒哉



蜀鑑卷第四

蜀鑑卷第五

江左不用蜀

晉咸康元年詔建威將軍司馬勲將兵安  
集漢中漢主壽擊敗之壽遂置漢中守宰  
戍南鄭而還

永和三年荊州刺史元溫伐蜀取之蜀故  
將鄧定隗文等反入據成都征虜將軍楊  
謙棄涪城退保得陽

涪城今綿州得陽今寧府

振威將軍蕭敬文殺楊謙于涪城遂取巴  
西通于漢中

永和四年益州刺史周撫擊范賁斬之益  
州平

賁范長生之子隗文等立爲帝

梁州刺史司馬勲出駱谷破趙長城成壁  
于懸鈞

趙主石虎死國亂雍州豪傑遣使告晉  
司馬勲帥衆赴之勲出駱谷破趙長城  
成壁于懸鈞去長安二百里使治中劉  
煥攻長安斬京兆太守劉秀離又拔賀  
城三輔豪傑多殺守令以應勲凡三十  
餘壁衆五萬人○水經注渭水之東駱  
谷之水出其南山洛谷水北流逕長城  
西

司馬勲釋懸鈎拔宛城殺趙南陽太守袁  
景復還梁州

宛城南陽縣

永和十年元溫大舉伐秦遣司馬勲出子  
午道

溫統步騎四萬發江陵水軍自襄陽入  
均口至南鄉步兵自淅川趣武關○子  
午道從杜陵徑漢中均口南鄉淅川皆  
在今鄧州武關今商州春秋左傳哀公  
四年少習卽武關也

司馬勲掠秦西鄙

元溫別將進擊青泥城破之涼秦州刺  
史王擢攻陳倉以應溫秦主健遣太子  
萇等帥衆五萬軍于峽柳以拒溫夏四  
月己亥溫與秦兵戰于藍田大敗之元  
中又敗秦丞相雄于白鹿原溫至灊上

秦太子萇退屯河南秦主健與老弱六  
千固守長安小城悉發精兵與萇合兵  
以拒溫三輔郡縣皆來降者老有垂泣  
者曰不圖今日復見官軍○泥水水經  
注北歷峽柳城魏置青泥軍於城內故  
謂之青泥城卽峽柳關亦名藍田關白  
鹿原三秦記云周平王東遷之後有白  
鹿遊此因得名並在京兆府藍田縣  
破之勲退屯女媧堡

秦丞相雄帥騎七千襲司馬勲于子午谷  
女媧堡寰宇記云藍田出有女媧氏谷  
或云今金州有女媧山非也

秦丞相雄擊司馬勲於陳倉勲奔漢中  
王猛謂元溫曰公不遠數千里深入敵  
境長安咫尺而不度灞水百姓未知公  
以不至溫兵不利溫指秦麥以為糧旣

而秦人芟麥清野以待之温軍乏十六  
月徙關中三千餘戶而歸司馬勲自陳  
倉奔漢中涼秦州刺史王擢亦奔畧陽  
○灊水出京兆府萬年縣灊城秦繆公所  
築

哀帝興寧三年益州刺史周撫卒以其子  
健爲太守楚代之

撫在益州三十餘年甚有威惠

梁州刺史司馬勲舉兵反圍周楚于成都  
大司馬温遣朱序救之

勲常有據蜀之志憚周撫不敢發及撫  
卒遂舉兵反引兵入劔閣圍周楚于成  
都

海西公太和元年荊州刺史元豁遣元羆  
攻南鄭討司馬勲朱序周楚擊司馬勲獲  
之大司馬温斬勲傳首建康

簡文帝咸安元年益州刺史周楚卒以寧  
州刺史周仲孫爲益州刺史

大司馬溫以梁益多寇周氏世有威名  
乃以周仲孫代楚守蜀

孝武帝寧康元年秋七月大司馬溫薨

論曰晉室南渡中原非復晉有猶曰五  
胡崛起力未易支也若夫吳蜀屑齒之  
邦孫劉連衡用之以抗曹魏矣元溫之

取蜀也擇忠信之長嚴毅之帥藩聚其  
生齒教誨其人民招集其流離驅遠其  
蠹賊庶幾積年之汙俗咸與惟新然後  
命一將以出秦川而自將以向宛洛孔  
明之志庶幾少伸矣哉軍至霸上徒出  
而歸司馬勲犄角之師曾何足仗西土  
之憂未艾也溫死而符堅得蜀矣堅凝  
之難信乎

符堅取蜀

晉寧康元年秦王堅使王統朱彤帥卒二萬出漢川毛當徐成帥卒三萬出劔門入寇梁益

梁州刺史楊亮帥巴獠萬餘拒之戰于青谷亮兵敗奔西成彤遂拔漢中徐成攻劔門克之

青谷未詳西成今金州劔門金隆慶府秦梁州刺史楊安進攻梓潼太守周虓守涪城母為朱彤所獲虓遂降於安安克梓潼

荆州刺史元豁遣江夏相竺瑤救梁益瑤聞廣漢太守趙長死引兵退益州刺史周仲孫勒兵至綿竹帥騎五千奔于南中秦遂取梁益二州邛笮夜即皆附於秦仲孫坐失守免官

秦符堅以楊安為益州牧鎮成都毛當為  
梁州刺史鎮漢中姚萇為寧州刺史屯墊  
江王統為南秦州刺史鎮仇池

墊江今合州仇池今成州

元冲以毛虎生為益州刺史領建平太守  
以虎生子球為梓潼太守虎生與球伐  
秦至巴西以糧乏退屯巴東

建平今歸州巴西治今閬州巴東治今

### 夔州

寧康二年蜀人張育楊光起兵擊秦遣使  
來請兵秦王堅遣鄧羗討之

益州刺史竺瑤威遠將軍元石虔帥眾三  
萬攻墊江姚萇兵敗退屯五城瑤石虔屯  
巴東

五城今潼川府中江縣晉屬廣漢郡縣  
有五城山故名城宮破延岑亦於此地



張育與巴獠首帥張重尹萬等五萬餘人  
進圍成都秦楊安鄧羗襲育敗之八月鄧  
羗敗晉兵于涪西楊安敗張重尹萬于成  
都南重死斬首二萬三千級鄧羗擊張育  
楊光于綿竹皆斬之

益州復入于秦○符堅雖得蜀而夔路  
未嘗失所以晉不乂復得之也

晉孝武太元三年秦梁州刺史韋鍾圍

魏

興太守吉挹於西城

秦旣得蜀遣長樂公丕等攻襄陽明年  
拔之韋鍾遂圍西城○魏興在今金州  
治西城縣

太元四年右將軍毛虎生帥衆三萬擊巴  
中以救魏興秦將張紹等敗之虎生退屯  
巴東韋鍾拔魏興吉挹死之

寰宇記吉挹為梁州督為符堅所敗於  
縣南九里峻山築城攻圍不下名吉挹  
城巴中今夔路巴東今夔州

太元六年秦王堅以裴元畧為巴西梓潼  
二郡太守使密具舟師

穆帝永和三年梓潼郡僞置巴西治今  
綿州符堅因之

太元八年十一月符堅入寇大敗于淝水

### 晉復取蜀

太元八年夏五月元冲帥眾十萬伐秦遣  
輔國將軍楊亮攻蜀拔五城進攻涪城秦  
遣張蚝姚萇救涪城張蚝出斜谷亮引兵  
還

元冲數伐秦蜀無功而還但拔蜀兩邑

○五城今潼川府中江縣涪城今綿州  
太元九年梁州刺史楊亮帥眾五萬伐蜀

遣巴西太守費統等將水陸兵三萬為前鋒亮屯巴郡秦遣王廣康回拒之

巴郡治今重慶府巴縣

姚萇擊秦王堅秦益州刺史王虬帥蜀漢之衆三萬北救長安

秦梁州刺史潘猛棄漢中奔長安

太元十年秦益州刺史王廣以李丕為益州刺史守成都廣帥所部奔還隴西蜀人隨之者三萬餘人

丕蜀人為江陽太守○秦政方亂而蜀人之歸秦者三萬人以夷獠亂其城邑而晉不暇謀也

蜀郡太守任權攻拔成都斬秦刺史李丕復取益州

以廣州刺史羅友為益州刺史鎮成都劉

裕討譙縱

晉安帝元興二年桓玄僭位益州刺史毛璩傳檄遠近討之進屯白帝

玄僭位遣使加璩散騎常侍璩執留玄使不受其命玄以桓希成三巴以備之璩傳檄遠近列玄罪狀遣巴東太守羅述征虜司馬甄季之擊破希等仍率衆次于白帝○白帝今夔州毛脩之及馮遷斬玄于江陵

玄以乘輿幸江陵以將之漢中屯騎校尉毛脩之璩之弟之丁也誘玄入蜀遂與毛裕之費恬擊玄於益州督護漢嘉人馮遷抽刀斬玄乘輿石人正于江陵桓振復陷江陵

毛璩遣將攻漢中斬桓希

義熙元年毛璩帥衆八三萬順流東下討桓振璩遣其弟瑾出外水參軍譙縱反殺毛

僅於涪城璩還城都為縱等所殺

毛璩遣其弟瑾瑗出外水參軍譙縱侯  
暉出涪水蜀人不樂遠征暉至五城水  
口謀作亂縱為人和謹蜀人愛之共逼  
縱為主縱不可走投于水引出之共逼  
縱登輿縱又投地固辭暉縛縱於輿襲  
毛瑾於涪城殺之璩至畧城聞變奔還  
成都益州營戶李騰開城納縱共殺璩

及弟瑗○外水今大江也庾仲雍云江  
州縣對二水口右則涪內水左則蜀外  
水內外水之所以名也江州縣即今重  
慶府涪水水經云出廣漢涪縣之小廣  
漢南入于墊江所謂內水也涪今綿州  
墊江今合州內水之原委也五城水口  
在鄰縣今中江縣水也中江縣自有一  
水入于涪即後漢之云廣漢郡有沈水

臧宮嘗破延岑于此水注水經云江水  
又東絕綿洛逕五城界至廣都北岸南  
入于江謂之五城水口此甚誤江水未  
嘗絕綿洛又逕五城而至廣都涪水亦  
未嘗逕五城與綿洛初無相干廣都又  
在五城之上非下流也舛誤甚矣大抵  
蜀自後漢以來由廣漢而下涪水多逕  
五城亦爭戰之地今中江縣也

義熙二年益州刺史司馬榮期擊譙明子  
于白帝破之

譙縱以弟洪為益州刺史明子為巴州  
刺史屯白帝

劉裕遣龍驤將軍毛脩之將兵與司馬榮  
期等討之脩之至宕渠榮期為參軍楊承  
祖所殺脩之退還白帝

宕渠宋於墊江置東宕渠郡今合州

義熙三年毛脩之與漢嘉太守馮遷擊楊  
承祖斬之

馮遷漢嘉人手刃栢玄者為鄉郡太守  
劉裕表襄城太守劉敬宣伐蜀以劉道規  
為征蜀都督

義熙四年劉敬宣與諸將至黃虎譙縱遣  
譙道福拒之敬宣引軍還

劉敬宣既入峽遣巴東太守溫祚以二

千人出外水自帥益州刺史鮑陋及水  
軍文處茂延祖等由墊江轉戰而前譙  
縱求救於秦王秦王興遣姚賞王敏將  
兵二萬赴之敬宣軍至黃虎去成都五  
百里縱遣譙道福悉還拒險相持六十  
餘日敬宣不得進食盡軍中疾疫死者  
大半乃引軍還○黃虎在今潼川府通  
泉縣寰宇記云有黃嶺川

義熙六年譙縱遣栢謙譙道福寇荊州荆  
州刺史劉道規大破之于枝江

謙等大陳舟師兼以步騎戰於枝江檀  
道濟先進陷陳謙等大敗道規遣斬謙

○枝江今江陵府枝江縣

譙道福陷巴東

益州刺史鮑陋卒道福陷巴東殺守將  
溫祚時延祖○巴東今夔州

義熙八年太尉劉裕以朱齡石為益州刺  
史帥臧熹劉鍾等伐蜀

義熙九年六月朱齡石從外水入成都臧  
熹從中水入廣漢

裕與齡石密謀進取曰劉敬宣往年出  
黃虎無功而退賊謂我今應從外水往  
而料我當出其不意猶從內水來也如  
此必以重兵守涪城以備內道若向黃



蜀鑑卷五  
虎正墮其計今以大衆自外水取成都  
疑兵出內水此制敵之奇也裕慮此聲  
先馳賊知虛實別有函書封付齡石曰  
至白帝乃開朱齡石等至白帝發函書  
曰衆軍悉從外水取成都臧熹從中水  
取廣漢老弱乘高艦十餘從內水向黃  
虎於是諸軍倍道兼行○外水都江水  
自江陽南安平模入成都內水涪水自

墊江德陽黃虎上涪中水發源為綿洛  
湔三水自江陽泝流上富義資中牛鞞  
上廣漢

論曰劉裕之發函書卽岑彭自墊江還  
江州泝都江上武陽之故智也

譙道福鎮涪城

以備內外

譙縱遣侯暉譙詵帥衆萬餘屯平模朱齡

石帥諸軍攻克之

齡石至平模去成都二百里侯暉譙詵夾岸築城以拒朱齡石以天時盛熟欲養銳息兵劉鍾曰不然賊阻兵守險者懼不敢戰也盡銳攻之其勢必克若緩兵相守彼知人虛實譙道福以涪軍來我求戰不獲軍食無資二萬餘人悉為蜀虜矣齡石從之諸將以水北城地險

兵多欲先攻其南城齡石曰今屠南城不足以破北若盡銳以拔北城則南城不麾自潰矣秋七月攻北城克之斬侯暉譙詵○平模今彭山縣

譙撫之屯牛鞞譙小苟塞打鼻臧熹擊撫之斬之小苟聞之亦潰

牛鞞今簡州陽安縣此中水所經由也打鼻寰宇記彭山縣有鼻鼻山亦名打

鼻譙小焉所據也

譙縱棄成都朱齡石入成都縱自殺獲譙  
道福于獠中斬之

蜀鑑卷第五

程